

[Augsburg], 9. November 1559

An Johannes Oporinus

UB Basel, Fr. Gr. I 11, fol. 228r-229r.
Steinmann Nr. 722.

(Abschrift des Briefes vom 25.10.1559, ohne das Postskript)

Exemplum hoc de industria retinui, quod mihi homo parum sobrius, cui literas dederam, suspectus fuit. Is verò qui tuas attulit, mihi visus non est. Sed D. Carinus, si quid scriberem, per D. Hieberi filium se curaturum promisit. Gregoram et Laonicum me viuo editum iri non spero. Causas non addo, ne vel de aliquib[us] male sentire videar, vel tibi sim molestus. Carinus et ego mouimus omnem lapidem, sed ne hilum quidem promouimus. Valeat igitur Gregoras, καὶ γρηγοροῦ μὴ βουλόμενος, παρὰ κιμμερίοις ναρκούσθω. Me laborum quos caepi paenitet, acie praesertim oculorum hebetata lucubrationib[us]. Molestè etiam fero, nos excoriato boue in cauda deficere. Plura scribere piget et pudet. Tu meliorem nauabis operam excienda ecclesiastica historia, et alijs doctorum operibus, inter quae Cuspinianum negligi si res tuae ferrent, nolle. παρὰ σοίγε καὶ ἄλλοι οἵ κέ σε τιμήσωσι, μάλιστα δὲ μητίετα Ζεὺς. Molestè fero me tibi non posse aliqua saltem ex parte referre gratiam, habere certè non desino, atque subuereor, ne παρρήσιᾳ mea, iustissima illa quidem, si aures mihi accommodasset non ἡ ὅρμῃ, ἀλλ' ὁ λογισμὸς, vtrique nostrum incommodarim. Sed diutius quam par est, in his salebris haereo, quae in malam rem abeant, si nolunt in bonam. De Demosthene quae scribis, non satis intelligo, Knöringerus cum redierit, interpres erit literarum tuarum. Is enim si eum non attulerit, facilè intelligam, eum aut a Morellio nondum excusum esse, aut tibi nondum allatum. Vale quam felicissime, id est, vt meretur industria et virtus tua, cui quod fortuna non respondeat, ἀμέλειαν τῶν θεῶν εἶναι τις ἀν φήσειεν, si verbo Isocratis nostri vti licet. Sed in deos nulla cadit vtrique negligentiae suspicio, in eos cadit, qui Deorum muneribus si non turpiter, at secus quam oportebat, abutuntur. Iterum vale. 9 Nouembris. 1559. Raptim à caena.

Hiero[nymus] Wolfius
T[uus].